



**PEJABAT KETUA PENDAFTAR
MAHKAMAH PERSEKUTUAN MALAYSIA
ISTANA KEHAKIMAN
PUTRAJAYA**

KENYATAAN MEDIA

**OPERASI MAHKAMAH SEMASA PELAKSANAAN TOTAL LOCKDOWN FASA
PERTAMA BERKUAT KUASA MULAI 1 JUN 2021**

Selaras dengan pengumuman YAB Tan Sri Dato' Hj. Muhyiddin bin Hj. Mohd Yassin, Perdana Menteri Malaysia melalui kenyataan media Pejabat Perdana Menteri pada 28 Mei 2021 mengumumkan 'Total Lockdown' Fasa Pertama di seluruh negara berkuat kuasa 1 Jun 2021, YAA Tun Tengku Maimun binti Tuan Mat, Ketua Hakim Negara telah mengarahkan bahawa berkuat kuasa 1 Jun 2021 pengendalian kes-kes Mahkamah di seluruh negara hendaklah berpandukan kepada arahan-arahan berikut:

(a) Perbicaraan / Pendengaran Kes Sivil dan Jenayah

- (i) Semua perbicaraan / pendengaran kes sivil dan jenayah yang telah ditetapkan secara kehadiran fizikal di Mahkamah hendaklah ditangguhkan dan penetapan tarikh perbicaraan / pendengaran yang baharu akan dimaklumkan kemudian;
- (ii) Bagi kes-kes sivil, pendengaran kes hendaklah dijalankan melalui teknologi komunikasi jarak jauh berdasarkan Arahan Amalan Ketua Hakim Negara Bilangan 1 Tahun 2021 Pengendalian Kes Sivil Melalui Teknologi Komunikasi Jarak Jauh Bagi Mahkamah Di Seluruh Malaysia (AA KHN 1/2021). Bagi maksud ini, pengendalian prosiding melalui kaedah hibrid adalah tidak dibenarkan dan perenggan 6, 9 dan 14 AA KHN 1/2021 adalah tidak terpakai; dan
- (iii) Dengan mengambil kira tempoh pelaksanaan 'Total Lockdown' Fasa Pertama ini, sekiranya agensi kerajaan, peguam dan orang awam

mempunyai kesukaran dalam meneruskan perbicaraan dan dikhuatiri akan menjejaskan hak pihak-pihak untuk mendapatkan perbicaraan yang adil melalui teknologi komunikasi jarak jauh, pihak agensi kerajaan, peguam dan orang awam boleh memohon untuk menangguhkan kes;

(b) Pemfailan Kes Sivil dan Jenayah

Pemfailan kes-kes sivil dan jenayah baharu / notis rayuan dan dokumen-dokumen akan dilaksanakan seperti biasa melalui sistem aplikasi Mahkamah;

(c) Pengurusan Kes Sivil dan Jenayah

Pengurusan kes sivil dan jenayah hendaklah dijalankan melalui teknologi komunikasi jarak jauh;

(d) Pertuduhan Baharu, Permohonan Perintah Reman dan Permohonan Jenayah Pelbagai

Semua pertuduhan baharu, permohonan perintah reman dan permohonan perintah jenayah pelbagai hendaklah dijalankan melalui kehadiran secara fizikal di Mahkamah;

(e) Perakuan Segera / Permohonan Segera Bagi Kes-Kes Sivil dan Jenayah

Pihak-pihak boleh memfailkan perakuan segera / permohonan segera bagi kes-kes sivil dan jenayah sekiranya perlu dan Mahkamah akan memberikan arahan lanjut kepada pihak-pihak berhubung dengan perkara tersebut; dan

(f) Permohonan Jenayah Yang Perlu Dijalankan Melalui Kehadiran Secara Fizikal Di Mahkamah Atasan

Bagi permohonan jenayah yang perlu dijalankan melalui kehadiran secara fizikal di Mahkamah Atasan atas sebab-sebab yang khas dan dalam keadaan

tertentu (*exceptional circumstances*), Mahkamah akan menggunakan budi bicara dalam mempertimbangkan permohonan tersebut.

Untuk makluman agensi kerajaan, peguam dan orang awam—

- (a) arahan ini mengatasi kesemua arahan terdahulu berhubung dengan operasi Mahkamah dalam tempoh kawalan pergerakan yang telah dikeluarkan oleh Pejabat Ketua Pendaftar Mahkamah Persekutuan melalui e-mel pada 17 Mac 2020, 26 Mac 2020 dan 24 April 2020; dan
- (b) arahan ini hendaklah terpakai sekiranya Kerajaan mengumumkan untuk melanjutkan pelaksanaan 'lockdown' ini dan tertakluk kepada apa-apa arahan baharu yang dikeluarkan.

Bagi sebarang pertanyaan mengenai perkara di atas, bolehlah menghubungi **Bahagian Komunikasi Korporat** di talian 03-88804051 / 03-88804607 atau komunikasikorporat@kehakiman.gov.my

Sekian, terima kasih.

**Pejabat Ketua Pendaftar
Mahkamah Persekutuan Malaysia
Istana Kehakiman
Putrajaya**

Tarikh: 29 Mei 2021